

焦太史編輯國朝獻徵錄

焦太史編輯國朝獻徵錄卷之三十三目錄

禮部一

尚書

崔亮

朱夢炎

僕斯

李叔正

門克新

陳迪

李至剛

鄭賜

呂震

胡澗

楊翥

石瑁

鄒幹

周洪謨

施純

張文質

劉安

徐瓊

傅瀚

張昇

李傑

張駿

周經

傅珪

田景賢

李遜學

關中劉必達

同校

吳興茅元儀

錢唐徐象樞

刊行

目錄

畢

焦太史編輯國朝獻徵錄卷之三十三

禮部一

尚書

奉議大夫禮部尚書棗城崔公亮傳 雷禮

崔亮棗城人洪武元年授中書禮曹主事遷濟南知府以母憂起復爲禮部尚書癸未詔定官員親屬冠服之禮亮於內外官員父兄伯叔子孫弟姪及隸卒軍士等制各定有差三年 上諭亮曰司天臺言朔日以來日中有黑子占者多以爲祭天不順禮所致令亮制之亮引周漢唐宋及元損益不同復以我

國朝前議園丘從祀之禮以漢唐爲類故止祀日月
星辰太歲爲簡當上然之而止復問郊祀天地拜位
皆正中而百官朝參則列東西避正中何也亮對以
天子祭天升自午陛祭社升自子陛蓋社主陰陰北
方也故君南向答陰之義也郊主陽陽南方也故君
北向以答陽也若羣臣朝參無答神之義俱當避君
上之尊故升降則皆由卯陛朝班則分列東西以避
馳道此其義不同上由是益重亮因命百司朝參左
右班不得越三尺省府臺公俱就拜甬道上下復承命
議百官及內史監官於皇太子親王前褥殿下自

稱名若本宮內史本府官及承奉司於 皇太子親
王前俱稱殿下自稱臣百官在上前稱 皇太子稱
親王曰某王又定大朝會常朝及內外官員辭謝奏
事侍班等禮付侍儀司行之并定 皇太子以下及
羣臣賜坐殿上坐墩墩制參酌宋典各爲等差其他
請旗蠶止祭於當祭之月與夫 宗廟四時之祭皆
用四時孟月及歲除凡五祭于清明等節各備時物
薦享俱允行之時禮儀草創而亮引正考據多本經
典云

禮部尚書朱公夢炎傳

黃佐

朱夢炎字仲雅南昌進賢人其先本袁氏以妹適之
繼兄後祖粹中宋末漕貢進士夢炎少孤粹中訓之
學成登元至正辛卯進士爲撫州金谿丞歲丙午以
故官入京延居上賓館 命與儒士熊鼎等集古之
忠良奸邪事實以恒辭直解之爲公子書及務農技
藝商賈書使貴賤之家講誦通知大義書旣成有白
金及衣帽鞞鞮之賜俄除國子博士俾領胄子教之
夢炎日以所爲書訓迪諸生兼使讀誦經書無所弗
率教者 上時召問夢炎奏對詳雅應制作爲文章

皆典則有據 上益重之吳元年遷翰林修撰坐小
誤出爲浙江按察司經歷洪武二年轉山西行省員
外郎是年入爲禮部員外郎尋陞侍郎十一年四月
陞本部尚書夢炎博學善記通歷代文獻之學如指
諸掌 朝廷稽古議禮審樂皆有力焉

禮部尚書傑公斯傳

傑斯字

應天府溧陽縣人汝元嘉定州知州來

附王師洪武元年授兵部員外郎本年擢尚寶符寶郎二年高麗遣使上表來貢方物遣斯齎印封之改尚寶司丞仍以祝文牲幣祭其境內山川詔曰朕肇膺正統誕撫多方乃眷爾高麗襲朝鮮之遺壤克遵中夏逾渤海而稱臣頃詔使之往迴卽表詞之來上有加方物良切衷情蓋由夙慕於華風用是恪修於臣職况爾三韓之屢世皆慎始終屬茲四海之一家何殊內外爰稽彝制載錫真封今遣某官齎印仍封

爾爲高麗國王於戲保民社而王纂榮懷於舊服中
禮義之國作屏翰於東藩其始自今毋替朕命故茲
詔云想宜知悉使回稱 旨日侍左右四年出知太
安州六年陞河間府知府俱以才幹著而民亦不擾
九年入爲戶部郎中尋陞戶部尚書本年調山西左
叅政十三年正月召拜吏部尚書二月改禮部尚書
三月詔定公侯稱號 上諭斯曰自今封公侯不必
加以散官已授券誥者且仍其舊若追封公侯生則
曾佩將軍印者仍列於銜於是斯等奏定則式爲三
公侯之銜曰開國輔運推誠宣力武臣某公某侯食

祿若干石世襲者曰世襲某公某侯食糧若干石追封者曰開國輔運推誠宣力武臣某將軍某公某侯追封某王某公謚某本年以年老致仕

禮部尚書李公叔正傳

黃佐

李叔正初名宗願字克正南昌靖安人其先唐宗室世家四會至殿中侍御史翰林學士積中始家南昌叔正生而聰穎善記年十二以能詩聞人以神童呼之既長博通諸子百家之言江西十才子叔正其一也方陳友諒陷南昌時妻夏氏投井死叔正終身不再娶歲丙午初設國子學有以宗願名薦者擢爲學正洪武三年告歸田里許之既退自齒於齊民已而廷臣以太學舊僚文行兼備無若叔正者登名薦劾誤以克正爲叔正四年徵至京師仍除國子學正遷

渭南縣丞時同州人與蒲城人爭地連年不決行省以是事委之叔正卽單騎至其處召二家至前立談而決縣歲輸糧二萬而田無定額乃令里社丈量立法密而用刑嚴奸慝讐服畢獻其誠於是豪右失計公私交便遷興化知縣尋召爲禮部員外郎年老乞骸骨不許除國子學助教叔正凡三至太學至是日與諸生講解立課程而督勉之雖貴胄待之愈嚴且夕端坐聽察誦習無倦容暇輒會計廩餼毫髮無敢欺者朝論推讓其賢能遂遷監察御史嘗奉命巡嶺表因適瓊州府吏訐告其守進表公座僉名

鞠之抵克罪而守之誣得直 上聞而大悅獎諭之
日人言老御史懦乃明斷如是邪連擢湖廣叅政陞
布政使 召還爲禮部侍郎十四年陞本部尚書卒
年六十四

禮部尚書門公克新傳

克新鞏昌秦州人爲人寬厚和易始爲本州儒學訓導二十六年秩滿來朝時天下學官入覲者咸命侍朝或試文辭詢問經史及民間政事得失在列者多應對不稱旨獨克新敷奏亮直上甚重之時紹興府儒學教授王俊華亦以善文辭稱旨遂擢俊華爲右春坊右贊善克新爲左春坊左贊善後陞令官未幾以疾請告命太醫給藥物不輟其祿已而病遂卒上嗟悼遣官祭之命有司護喪歸葬於鄉

禮部尚書陳公迪傳

陳迪字景道少儻有志操領洪武乙卯鄉薦辟郡學訓導嘗爲郡撰萬壽賀表上覽而異之除翰林編修進侍講預修大典擢山東布政司左叅議捕蝗弭盜民甚德之再遷雲南左布政時普定曲靖烏撒烏蒙諸夷煽亂迪擊破之捷聞有白金綵幣之賜召入爲禮部尚書革除二年朝廷因災求言迪條陳清刑獄恤流民等事多見採納尋加太子少保辭不受靖難師起迪與太常寺卿黃子澄兵部尚書齊泰等上書陳論大計事敗文廟召迪等責問迪抗辭不

屈遂與子丹山鳳山等六人同日伏誅子孫俱盡迺
既刑人於衣帶中得詩有曰三受天王命新山河
帶礪此絲綸千秋公論明於日照徹區區不戒心又
有五噫詞並悲烈蒼頭侯來保者招其遺骸以歸是
時宗媼悉戍邊徼洪熙改元始詔釋之同時有俞逢
辰者字彥章永陽西鎮人洪武初選充燕府伴讀靖
難師起嘗以力諫被誅先是逢辰寓書其家示以必
死至是果然予得之王給諫蓋云

文廟繼統召公賁問公不屈與子丹山鳳山等六人
同高干市丹山等哭叫曰父親累我輩也迺曰今日

休說這話 文皇命割其子肉塞入廸口令自喫之
因問曰好喫否廸曰這是忠臣孝子肉香美好喫初
廷臣同約死義者二十五人惟鄭賜黃福尹昌隆歸
附後數十年有司於公故居立祠祀之

革除遺事

資善大夫禮部尚書兼左春坊大學士敬齋李

公至剛墓表

楊士奇

李氏之先出唐宗室五代時避地於越後之白之寧
海高祖曾祖諱栗祖諱炳考諱整明書詩春秋洪武
初分教華亭縣學因家焉後爲鄞州同知卒於官歸
葬華亭娶華亭沈氏生公公諱銅字至剛號敬齋以
字行少穎敏不羣嘗從學楊廉夫爲詩文有清思洪
武戊辰舉明經奉命侍懿文太子初授祠部試郎中
既實授坐累謫戍邊無幾召還爲虞部郎中尋陞河
南布政司右叅議會河決汴隄居民危懼公建議假

王府積木作筏濟之人賴全活甚衆調湖廣布政司
左叅議 太宗文皇帝入正大統公來朝大臣有言
其才且洪武舊人遂以爲通政司右通政方修洪武
實錄公與焉且暮在下左右道說洪武中事甚親密
是冬陞禮部尚書時禮部之務叢挫公長於判繁修
理井然益見寵遇實錄成有白金文幣金織衣之賜
永樂二年春冊立 皇太子命公以冊書兼左春坊
大學士東宮開經筵公與右春坊大學士解縉最先
進講及修永樂大典四方文儒皆集仍以公董之無
幾爲侍郎宋禮所間見疏歲餘降儀制郎中然遇廟

務必以屬公解縉素厚公既遭讒出又以公言其怨
望後召下獄而并下公 仁廟嗣位念公舊宮臣復
以爲通政數月又念其老不任朝參改知興化府時
朝廷方需仁澤於天下公仰祇德意勞心撫綏郡民
德之甫再歲歿于官宣德丁未七月四日也享年七
十

資政大夫禮部尚書鄭公賜神道碑銘

胡儼

公諱賜字彥嘉姓鄭氏世爲閩之建寧人洪武甲子以易經領鄉薦明年擢進士拜監察御史時天下郡邑吏多以浼冒獲戾逮繫無虛日朝廷宥遣戍邊特命公於龍江編次其行伍值暑甚公召諸械者諭以主上恩意開示大信脫其械俾各僦居止息每旦一來見衆感悅如期無敢後其有疾病羸弱者日蠲祿米具饘粥湯藥以給之獅子山有道士某僧某見曰鄭御史法官也能惠施若此吾徒寧無愧乎於是相

率出資設行庖為飲食諸戍徒賴以全活者甚衆道
路往來困乏之人亦獲其濟皆嘆曰此鄭公惠也秩
滿陞湖廣布政司右叅議始至諸曹吏驕蹇奔縱公
召立庭下訓飭而約束之吏斂手不敢為非多考滿
擢用為材官於是皆感公之德公於政利有當興害
有當去施罷不埃日諸峒苗獠反側不常鄰境郡縣
數被侵毒公召其酋長布告恩威結以信義寬其徭
賦諸酋感激拜謝誓不再為惡鄰境之民悉得安堵
轉北平布政司右叅議舉措施為咸得其宜吏民胥
悅 今上時在藩國公服事惟謹尤被眷愛復以事

相連謫置安東屯行次巽北山谷間父老數干載拜
於路曰吾儕小人仰盛德者久矣今獲一見幸甚各
載食與漿相迎勞又携鈔千貫來獻公力拒不納遂
行未幾拔爲工部尚書 上卽位轉刑部尚書賜內
廐名馬踰數日以憂懇請去位 上初政圖任舊人
勉留公乃止每旦出則正衣冠視事夕入則易服就
位哭奠如儀永樂三年遷禮部尚書凡朝會祭祀貢
獻禮儀參酌準式質文彬彬奏議詳雅人誦其能嘗
病暑 上數遣人賜藥物有詔命儒臣纂修永樂大
典公實監之公接士有禮御下有恩以寬廉平直聞

於天下號稱名臣永樂六年卒

禮部尚書呂公震傳

呂震字克聲臨潼人自幼穎悟日記萬言人以神童稱之洪武中鄉舉入太學朝廷欲稽郡邑壤地以均貢賦震承檄如兩浙民不勞而事集還授山西僉事繼入爲戶部主事復爲北平僉事永樂初以勤勞召爲大理少卿尋陞大理卿及刑部尚書皆克盡厥職繼遷禮部垂二十年凡禮樂制度郊廟祠祭燕享賜賚朝覲會同之事皆擬定其手時論稱之時太夫人年老得承命歸省者三凡兩值關中饑卽命所司出粟賑之暨還條列以聞上是焉人咸謂得大臣

仁宗卽位嘗從容上言百司庶政具有成法悉遵祖訓行之勿有所更則永世有賴 宣宗卽位以震舊勳凡冊立拜封宴勞之事一任於公而不疑震爲人沉實寡言笑孝友聞于鄉閭信義著于朋友善善惡惡無所阿徇凡有見聞無不指陳於上以明其曲直尤善薦士士由公出者率爲顯官宣德元年卒

史鑑

呂尚書震在禮部時 文皇帝數自將伐北虜吏部奏尚書義曰部夏尚書原吉皆切諫 上上不聽 一日 上問原吉曰今糧儲足給幾年原吉意 上

又將出師因詭對曰才穀半年耳 上疑其誕乃令

中官御史按之則十年尚有餘也 上大怒以原吉

等朋黨欺妄居嘗憤詈時兵部方尚書賓提調靈濟

宮日有中使至宮賜香數語賓以 上怒故賓惶懼

自縊死朝房中有司以聞 上立命判其屍且械繫

原吉錦衣衛獄以震兼領戶兵部事時變起倉卒諸

大臣相繼罪死 上怒不已中外洶洶咸不自保

上慮震自危親 諭之曰茲事卿本無與朕坦懷相

期毋得自疑但當爲朕盡忠輔政耳又令校尉十人

隨震起居以防之密 勅曰震萬一自盡爾十人者

皆代之死震乃頗自安震聰明絕人每朝奏請他尚
書皆執副本又與左右更進迭奏震既兼三部奏所
愈多皆自專請對侍郎不與也情狀委曲千緒萬端
一覽之後輒背誦如流未嘗有悞又嘗扈從 上北
狩 上駐蹕虜地見碑立沙磧中其文具在幸從臣
讀之後一年 上與諸文學語及碑因 詔禮部差
官往錄之震奏曰臣當時與讀此今尚記憶不須遣
使也遂請筆札于 上前疏之 上不信密使人至
虜中拓其本回校之無一字脫悞其彊記如此

禮部尚書致仕贈太保諡忠安胡公濙神道碑

銘

李賢

公諱濙字源潔別號潔菴其先淮安宿遷人有諱藩者仕劉宋爲太子左衛將軍遷豫章數傳至諱咸者仕唐爲侍御史子常州刺史瓊生持因家于常遂爲武進人持四世孫曰宿仕宋爲樞密副使宿十一世孫曰中立爲常州制置中立生昭公之高祖也曾祖庸仕元爲浙江儒學提舉祖頴爲常州路醫學錄考宗仁隱居不仕皆以公貴贈光祿大夫少傅兼太子太師禮部尚書曾祖妣章氏祖妣徐氏妣李氏皆贈

一品夫人公生而髮白彌月方黑母夢一僧持花以遺之覺而生公居數日有僧至家索觀公見僧卽笑僧曰此吾師天池高僧後身也命我求見以笑爲誌聞者咸驚異之公自幼端重不好嬉戲弱冠入邑庠洪武中領鄉薦登庚辰進士第授兵科給事中尋遷右給事中公勤識大體士林譽之 太宗文皇帝入正大統公供職如舊永樂改元秋以奏對稱旨陞戶科都給事中丁亥 上察近侍中惟公忠實可託遂命公巡遊天下以訪異人爲名實察人心向背時御製性理大全爲善陰厲孝願事實書成俾公以此

勸勵天下以故雖窮鄉下邑軌跡無不到在湖廣間
最久丙申秋還朝丁內艱乞終制不允尋進禮部左
侍郎明年往巡江浙諸州授嘉議大夫癸卯復自均
襄還朝時 車駕親征北虜駐蹕宣府公馳謁行在
所 上卧不出聞公至喜而起且慰勞之曰卿驅馳
良苦賜坐與語凡所歷山川道里郡邑豐嗇民情休
戚以至所聞所見保國安民之事悉爲陳說 上欣
然納之向所疑慮者至是皆釋比退漏下四鼓先是
仁宗皇帝爲太子監國時有飛語上聞 文廟屬
公往察之公至以所見七事皆誠敬孝謹密疏以聞

上覽之大悅自是不復疑仁仁宗嗣位特 賜誥

命授正議大夫資治尹已而闡公曾有密疏疑之乃
轉太子賓客兼國子祭酒之官南京未幾閱章奏見
公所上密疏深嘉其忠方議重用之而 龍馭上賓

矣 宣宗皇帝卽位復禮部左侍郎兼職如故洪熙
乙巳冬公自南京來朝 上素重公及入見顧問良

久卽留任行在禮部事宣德改元春進尚書是歲秋
漢王謀叛事覺公贊 上親征事平公受賞賚甚厚

復給叛者家屬四人丁未 賜誥命投資善大夫復

賜近第一區於長安右門外闈者二人戊申 上嘉

公忠勤特 賜銀章四其二曰文恭世家曰清和恭

靖蓋嘉美褒美之也尋以公生辰 賜宴於其第秋

八月公扈從巡邊至會州而還巳酉 命兼詹事府

事夏五月復扈從北巡時常民有豪橫者既抵於法

悉以田宅賜公辛亥 命兼行在戶部事 聖節御

製詩一章賜公及蹇忠定楊文貞文敏三公且曰朕

茂膺天眷惟爾四人贊翼之功因賜宴盡醉而罷新

建禮部成命光祿設宴勛戚公卿皆往賀公公以爲

盛事立石廳事之右倚任益隆每燕見 上虛心問

曰卿有何言得其章奏卽施行之時有芝產於公署

人以為公和氣所召。今上皇帝踐祚亦惟國任舊人待公尤厚。凡軍國重務皆與聞。加投資德大夫。正治上鄉。每考績必有賚。予甲子以年至七十。上章乞致仕。上以公精力未衰。慰勉留之。己巳。上親征北虜。命公留守京師。秋八月。進太子太傅。崇祿大夫。景泰初。賜誥命。辛未。春。公因災異。數見乞放免。以回天意。不許。尋進少傅。壬申。兼太子太師。二俸兼支。公固辭。一体癸酉。復。賜誥命。進階光祿大夫。自後。每歲引年乞歸。皆不許。丙子。復因災變。乞賜罷黜。亦不許。時公年八十二。忽疾作。艱於步履。明年。皇

上復位公喜不自勝扶疾入朝而筋力不可強矣遂乞謝事且辭師傅二職上方重用耆舊憫其老皆從之

陛辭賜白金寶鍤金織襲衣給驛舟以歸復賜璽書有卿宅心允臧處事惟慎雖經變故無改厥常之論歸之日鄉人老稚聚觀首以億萬計公陳所受賜於堂感激泣下遣家子長寧詣闕申謝上念

公歷事累朝遂官長寧爲錦衣衛世襲鎮撫俾歸終養公之弟克恭克寧克誠時年皆七十餘蒼顏白髮燕樂於一堂遂扁曰壽愷優游桑梓者七年疾復作召諸子前曰爾輩圖報國恩勿墜家聲遂瞑目而逝

天順七年八月八日也享年八十有九終之夕常州
守卓天錫夢公來辭已而聞終大以爲異計聞上
爲之震悼贈太保諡忠安遣官諭祭於其家復令有
司營葬事恩榮始終世莫與比公爲人平易寬和廉
靜寡慾自奉澹薄起居有常居官敬慎一毫不苟歷
事 列聖無纖毫過舉蔚然爲一代名臣立朝幾六
十年薦拔士類甚多十知春闈貢舉天下之士盡出
其門平居未嘗疾言遽色雖庸夫孺子亦知其爲長
者暇則手不釋卷喜爲詩文晚年舉望益尊其酬應
愈劇曾不厭倦所著有芝軒集若干卷又嘗輯錄醫

藥經驗者曰衛生易簡方經進又有律身規鑑俱行於世

正統十四年北征留守京師廷議迎 上皇時王文

屬色曰孰謂虜可和彼不索金帛且索土地憂方大耳衆相顧不敢言于少保徐曰防變方略我與總戎責也俄旅退賴公有定執竟上奉迎儀注景泰元年楊善使虜公言 上皇蒙塵已久宜附善等以進服

食不報又請明年正旦朝 上皇於延安門不許三

年十一月 上皇萬壽節公乞令百官拜賀於延安

門不許及 上皇復位力疾入一見請老去 上念

公疏屢請百官朝廷安門因其遣子長寧來謝授官

錦衣世鎮撫

藏書

景泰中王文威權赫奕忤者必死史科給事中林聰獨上章劾之文銜之日求其罪不得會聰鄉人有事吏部聰爲囑之文選郎中出其手書欲寘之死會官廷議擬大臣專擅選官律廷臣附會文意無敢違者胡忠安公謂文曰給事中七品官也而擬於大臣囑托公事也而擬以選法二者於律合乎且人臣以宿怨而殺諫官無乃不可乎遂拂衣而出曰此疏我不預等自爲之於是遂罷日再議之公歸卧病不朝數

日 上問胡尚書何不朝以病對乃遣太監與安問
病公曰老臣無病前日議事驚悸太過耳問何事公
曰諫官有小罪而欲殺之此所以悸也與安以告於
上既而法司復以比擬諭罪 上不允聰得免死

守溪筆記

禮部尚書吳縣楊公翥傳

王 鏊

楊翥字仲舉吳縣人宋和恭武王存中八世孫少孤貧與兄戍武昌爲鄉校師有狂生侮詈之翥若不聞人以告翥曰豈無同姓名者邪人服其長者久多化之楊文貞公士奇漂寓武昌偶憩翥館以無資告翥遂讓其塾自教授他所日往返十餘里不厭比文貞營路乃相引拔仁宗素知翥遣使驛召之授翰林編修升修撰與修三朝實錄遷郕王府長史而歸景帝卽位者朝京師命爲禮部左侍郎食祿致仕又二年復朝進尚書加祿仍歸翥篤行不欺仁厚絕

俗鄰人作室於澗落者家家人不能平者曰晴多雨少何必校也又鄰人生子者恐驢鳴驚之卽齋所乘驢徒步入朝猶子懷金入市爲人攘去以告者不答或請理於吏者不許文貞公落新第丞邀登堂曰舍初成得賢人首臨之其寬雅德度一時著聞至今郡人以爲口實爲文章平實有理如其人年八十五卒詔賜葬祭召其子肆入朝問所欲爲官對曰願得本縣主簿從之

資政大夫禮部尚書應州石公瑁墓誌銘

劉定之

公諱瑁字信之其父普金當元季兵變自雲中來徙
應州公既貴贈其父禮科給事中母王氏贈孺人公
資稟端厚自少知孝友舉動有儀父嘗有疾灼艾於
腹公亦取艾灼已腹醫止之公曰吾不忍父獨痛苦
也父嘗爲公製衣公曰兄年長於我請先爲兄製嘗
踰戶限衣絰而止兄戒以胡不緩步公跪謝後不敢
由是父兄皆奇公以爲當成大器父漸老矣家務上
下兄公於錢帛無毫髮私取與悉由兄所制領宣德

己酉鄉舉庚戌人國監登癸丑進士觀政戶部收通
州倉糧草去宿弊今上正統初授禮科給事中是科
嘗奏對事尤多公以舉職聞權知金華府鄰郡括蒼
盜起出兵擊之掠酒食殺人於郭外公執斬以徇始
帖然就部伍以去民避盜來者老稚扶攜千百爲羣
皆乏食非開官庾莫能濟上官疑莫敢公曰彼迫於
殍死則亦爲盜矣擅開庾與迫民爲盜罪孰重我就
其輕者得諱無悔也開以濟之歡聲雷動蘭谿吏徐
世揚浦江卒王猛烈皆爲其邑患苦公置之法衆以
寧謚毋憂去任都御史軒公親以公助弭括蒼盜饋

足守固民怙其仁兵懾其義非特其所游郡其旁近
亦有賴焉爲言于朝得旨起復還任尋陞福建右
布政使時所部內沙縣盜始平增築城以鎮其地以
公有聲於浙也城事悉以委公公爲之計工匠度財
用兵民合力近遠輻輳城完以期而無告勞者屬郡
稅比歲多逋聞公當督稅民咸相告來諭曰石公不
苟取於我無以此累之公生平以廉著稱福州守雷
礪以公當入覲持金往贖亦峻却之他可知也上
聞其賢以爲南京吏部左侍郎未幾遂召爲禮部
尚書靖恭於位朝望益孚甫三載而卒得年六十有

資德大夫正治上卿太子少保禮部尚書贈太

子太保諡康靖鄒公幹神道碑 徐溥

資德大夫正治上卿太子少保禮部尚書以碩德重
望致仕家居壽躋八十有四乃弘治壬子某月某日
卒卒之前二月公以杭屬縣大饑心切憂閔手具奏
疏以聞 上嘉公身居田里不預政事能達民隱如
此既詔有司如所奏賑恤卽出內帑文綺賜公以旌
其賢及是 上聞訃悼歎諭祭營葬一如卹典特贈
公太子太保諡康靖恩禮優渥人皆榮之公諱幹字
宗盛別號願菴姓鄒氏其先嘉興人也後徙仁和再

徙餘杭故今爲餘杭人曾州福堅妣某氏祖諱之資
政大夫禮部尚書妣沈氏贈夫人父濟詹事府少詹
事贈太子太保諡文敏妣薛氏贈一品夫人文敏公
在 太宗皇帝時爲官寮卒時公尚幼適 仁宗皇
帝監國南京特遣充應天府學生親蒙 諭勉賜鈔
二千貫仍月給米二石以資養之公感激奮勵力學
不懈正統戊午中鄉試明年遂登進士第庚申初授
兵部職方司主事歷陞署武選司員外郎郎中己巳
八月北虜犯邊 英宗皇帝北狩京師戒嚴一時所
需甲杖糧餉未有能任其劇者僉以公爲宜乃超遷

兵部右侍郎公瘴竭智力日共厥事倉猝間發廩以給兵士或不俟奏報而行一日兵士擁東城門請給馬草適鄉民萬計避虜走城下叫號求開門守者難之公曰草不得則廐馬不過瘦死爾城以衛民若無所衛焉用城爲且聞虜距城尚遠卽至近境門開無及而民皆死矣竟從公言獲濟及虜退明年改元景泰被勅獎諭辛未清軍職貼黃事竣改禮部壬申奉勅考察山西官吏癸酉河南鳳陽等處大水詔往救荒民多受惠凡爲奏免稅糧若干萬石旣歸命督易州山廠薪炭積弊頓革因奏設主事一人綜

核其事公獨總其綱而已居三年衆議以公不宜久處此 召還治部事尋陞左侍郎進階正議大夫資治尹天順丁丑 英宗復位尚書胡公方致其事去諸冊立大禮並從公詳定而行時襄王來朝故事當祭禁門而入自遷都後來朝禮絕莫有知者公檢太常故典行之及 上不豫復奏請 皇太子御文華門代朝禮成化丙戌 憲宗皇帝二年也 命撫安畿內許便宜行事明年以老辭位不允未幾特拜南京禮部尚書居二年 召還禮部仍令經筵侍班自是治部事者十年至加太子少保屢以老請 上皆

不允後復請不已特 賜勅致仕令馳驛還仍 命
有司月給米二石令給僕夫四人蓋家居者一紀而
終

資德夫夫正治上卿太子少保禮部尚書謚文

安周公洪謨神道碑

徐溥

周之先爲蜀之資陽人宋紹興中始徙叙州之長寧故今爲長寧人曾祖世祥祖本原父永隆俱儒學訓導邑人稱世儒周氏以別其族至公以儒術大顯於世公諱洪謨字堯弼號箴齋又號南臯子自少穎敏好學不倦侍父官長陽處諸子中卓然有名正統甲子領四川鄉試第一明年復占第一甲進士授翰林院編修景泰壬申陞左春坊贊善丙子修宸宇統志成陞侍講天順戊寅進侍讀署南京翰林院事甲申

憲宗卽位召修 英宗實錄改翰林院侍讀丁亥建
學士陞南京國子祭酒丁母憂服除改北京祭酒擢
禮部右侍郎由左侍郎拜本部尚書丁未進太子少
保積階資德大夫正治上卿 今上卽位之元年爲
弘治戊申 上念公嘗以老請致仕令乘傳而歸
陛辭之日恩禮不替又三年辛亥以疾卒於家壽七
十有二訃聞 命有司諭祭治墳仍 賜諡曰文安
公少以文爲業然有志政務多所建白初在翰林卽
勸 上勤經筵以講聖學謹內治以收政本復條十
三事以進及蜀寇作與長寧鄰境公稔知其出沒設

禦備之術甚悉遂見撿而其地宴然及爲祭酒整饬
規矩表率生徒且言修祀事廣倉儲禁酷刑減征稅
攘虜撫夷十事 上悉嘉納之又言 聖明尊崇孔

子其塑像冕服旣循前代之舊用 天子之制而禮

樂不稱封號不加殊爲闕典宜下禮部議之尚書鄒

公以尊崇孔子初不在此爲奏然朝廷竟用公言始

增邊豆舞佾之數在禮部時首言書載璿璣玉衡蔡

傳不得其制乞改造以備占候旣成有羊酒寶鈔之

賜後烏思臧等處人貢其貢使數踰舊制一歲中有

至三四千人者賞賜靡費不可勝計自長河西諸番

曾日以圖利公言此特無印符爲驗耳宜依海南諸
番例各給與符二十道入貢備填貢使物數于上
仍議以舊賜金印至關驗以防詐僞詔從其議
其費始省丁未月當食不食或以爲宜賀公謂此陰
虛之象其可賀耶遂止嘗奉命祭天壽山神見役
夫運載相繼於道知有所營建也歸言月令云盛夏
不可興土功又曰舉大事則有天殃今歲大旱未必
不由於此且時方炎蒸人易疾疫宜暫休息之不報
及既歸老婦中惓惓不忘朝廷猶力疾疏安中國禦
四夷十事遣人馳進悉命所司議行蓋公忠勤之

心至於終身乃已公平生尤善著述凡經史稍有疑
輒訂正之其爲文簡直不爲奇險語而理致明白粲
然可愛所著有疑辯錄三卷南阜子集二十卷等齋
集五十卷公之祖父並累贈資政大夫禮部尚書

維揚志

周尚書異事 國朝太宗伯洪謨中鄉貢日舟泊邗
江夜見一異人謂公曰吾卽子之前身也前程萬里
終身清要公曰子何人對曰吾友鶴丁山人公官南
京翰林日以詩訊太守三原王侯恕曰生死輪迴事
杳冥前身幻出鶴仙靈當年一覺揚州夢華表歸來

又姓丁侯得詩甚訝侯之耆老而訊之羅文節曰
友鶴山人吾友丁宗啓之父以詩名家元末隱處至
建文元年歿於成都以仙雅重於藩王有德人也侯
作以此回報宗伯世以爲異如羊祜房琯之事云

禮部尚書施純傳

純字彥厚順天府東安縣人成化丙戌進士改翰林院庶吉士初授戶科給事中陞鴻臚寺少卿再陞本寺卿純習禮度每旦侍朝爲磬折狀甚恭又諸司奏事上是之語頗溢純請以照例易之用是蒙寵眷遂擢禮部右侍郎未幾陞尚書一旦與殷謙等八人同加太子少保卒年五十一無子以例賜祭葬純身長偉然出羣類表不十數年得驟登峻秩前此未有也但在鴻臚怙寵不循分守多有所建請爲士論所少云

禮部尚書張文質傳

文質字充中直隸昌黎縣人正統七年舉進士授工
科給事中景泰中陞都給事中以音吐鴻鬯選爲通
政司右叅議天順初進左通政復進通政使成化中
加兵部左侍郎工部尚書仍命掌通政司事歲終以
母喪去服除仍以禮部尚書掌通政司事爲言官所
劾致仕至是卒賜祭葬如例文質爲人重厚有容居
官以孝稱歷官四十餘年無過舉其子忱亦舉進士
爲兵郎中

禮部尚書劉爰傳

爰字凌雲四川涪州人景泰甲戌進士授吏部驗封主事遷郎中以憂去服闋改戶部二年仍補文選公清勤慎時論與之累官太常卿禮部尚書掌寺事久典秩祀練習儀章且容觀魁傑音吐鴻暢甚爲憲宗所眷注進太子少保以疾乞致仕不允爰自陳世爲戎籍勅兵部除其籍弘治己酉爰復以老丐休賜馳驛并寶鑑以還仍命有司歲給夫粟家居凡十七年而卒訃聞賜祭葬如例爰平生謙謹承稱人之善聞論人過失輒止之或面侮之亦不校初艱

於立子官京師妾有生子者其妻妬而棄之道人爲
收鞠至八歲乃復迎歸以爲子聞者以爲及厚德之
報云

太子太保禮部尚書東谷徐公瓊墓誌銘

張昇

公諱瓊字時庸號東谷又號明農翁金谿人祖諱那
用績學有聲考諱貫道介特自將俱以公貴贈資政
大夫禮部尚書者也公自幼沉敏篤學深有造詣領
景泰庚午鄉薦舉天順丁丑進士第二人授翰林院
編修預修英廟實錄成化丙戌同考會試士下亥
修大明一統志成陞侍講辛卯秋闈被旨校文於
南京士咸服去取公當是歲偕兵部侍郎李震清武
職甚精丙申推陞南京翰林院侍讀學士署院事丁

未春陞南京太常寺卿掌南國子監事一時南士悉
賴造就行文卒歸於正弘治庚戌陞南京禮部右侍
郎癸丑改北部左侍郎丙辰陞尚書恭勤政務昕夕
不懈寅出酉還衣常不解事上處下忠誠不易結知
聖主眷禮異常遇郊歲賜緋袍有副戊午加授太
子少保是冬入朝而昏瞶遂臥疾於家上驚懼坐
遣中使扶醫往視尋賜豚肉及牛黃丸以療之進
階資政大夫加贈祖考尚書妣及配俱夫人庚申懇
疏乞骸上重違其情乃加太子太保從一品秩
賜璽書驛舟歸令有司饋米月三石僕夫歲四名

陸辭 賜酒饌又遣內侍齎麟袍玉帶白金寶鏡以
寵異之無論之意益勤致政後年八十有一卒

禮部尚書贈太子太保謚文穆傅公瀚行狀一

王 鏊

傅之先系出湘潭唐廣明之亂始徙清江之石頭宋
紹興間有爲經量隅官者諱彥升又徙新喻之黃塘
至公蓋十四世矣公諱瀚字曰川少穎秀拔異讀書
過目成誦始就外傅則往往推究與義人多奇之癸
未會試科場災寢疾幾殆忽神人見夢曰勿憂也公
前程遠大疾今愈矣其年八月中會試甲申 賜同
進士出身改庶吉士除翰林院檢討 憲宗一日於
內得古帖斷爛不可讀 命中使持至內館適公在

直印韻爲詩以假上大悅有珍饌法醮之賜

九載道修撰兼司經局校書日侍今上於春官遷

左諭德兼檢討允經筵講前官及東官講官今上

嗣位以舊學思進太常少卿兼侍讀仍允經筵講官

兼日講每進講誠意懇切敷陳詳婉而進止雍容

上每注聽焉憲廟實錄成進太常卿兼侍講學士

久之遷禮部右侍郎會南都缺叅贊命舉尚書倪公

公言倪之才何可寘之南或謂倪往公不當次進乎

公曰吾知爲國進恤其他初祠部給度十年一舉時

僧道集京師以萬計權貴多爲之請公力言此輩當

耗天下宜痛加禁革縱未能如 祖宗朝之制亦當

稍賜裁抑遂改十年給度之例時以龜山楊時從祀

孔子廟廷言者因論羅從愿李侗亦當從祀公言二

子著述跡尹焞游酢謝良佐未知所先後二子從祀

則三人似不可遺道學所在其可濫乎乃止知已未

貢舉周密詳慎宿弊頓清俄以本官兼翰林學士掌

詹事府事仍兼日講官會典副總裁庚申進禮部尚

書會京師地震雨雪四方日奏災異公因疏言方今

賦重役繁民窮財盡宜躬行節儉以先天下庶民困

苦可蘇持陝西地震異甚復率諸公卿條奏三十一

事如敬天勤民法祖修惠汰冗官罷工役減齋醮省
上供尤拳拳焉奏留中公復言民心易感在結之以
恩天意可回在應之以實屬者所陳謂當如拯溺拯
焚猶恐不及而側聽彌月未賜宸斷何以回天意哉
疏上報可陝西守臣得玉璽來獻乞頒示天下以爲
傳國之寶復出也公言以史傳諸書考之形制篆刻
皆不類其爲贗作無疑即使非贗人主受命在惠不

辨却
玉璽
之廣

在璽自前世以秦璽爲寶得之者君臣動色相慶我

太祖以聖德受命製一代之璽傳之 聖子神孫

壽昌之福萬世無極何藉於彼哉 上迺以其璽屬

庫吏以足疾在告 上數遣醫來視因乞致仕不允
公雖在告日理部事不息或勸少輟公務願養心神
公曰吾受上知遇辭祿不可辭位不可職事在吾其
敢自佚一日謂子元曰吾其歸乎夜夢祖妣來視吾
疾壬戌二月歿於京師 上賜寶鑑為治歛具贈太
子太保諡文穆諭祭者三給舟車道官護行為營葬
事

禮部尚書張昇

禮部尚書張昇字啓昭江西南城人也成化己丑進士第一人授翰林修撰後以皇太子出閣特改左春坊左贊善充東宮講讀官秩滿陞右春坊右諭德孝宗卽位以從龍恩進左庶子兼翰林侍讀故事特改官僚者例轉數階而昇以憂居後至但進一階疑大學士劉吉抑已撫吉過劾之忤上左遷南京工部員外郎以憂去服闋會吉已去位復庶子言數事多中時弊兼陞詹事府少詹事兼翰林院侍讀學士歷陞左右侍郎轉尚書時崔志端以太常樂舞

生積資至爲同官頗倨傲昇常別品以裁割屬官有
授徒講經者御史楊儀之子在講不能平劾昇不協
人望自是名益損屢爲言官所指嘗奉詔選宮女禁
優隸卒家不得與榜書隸爲吏衆閔然騰謗昇乃不
安於位遂致仕加太子太保劉瑾用事又以爲尚書
時裁抑晉府郡王封爵鑄所加官正德十二年冬卒
訃聞輟朝一日贈太子太傅 賜祭葬如例昇愿慙
有餘居官雖無大建白然自守謹飭爲文平實嘗主
兩京鄉試所取得侍郎儲燾編修陳淵皆名士論者
以爲得人

禮部尚書李傑傳

禮部尚書李傑字世賢蘇州府常熟縣人成化丙戌
進士改翰林院庶吉士授編修陞侍講二十二年充
東宮講讀官秩滿陞侍讀學士弘治初以官僚恩
陞左春坊左庶子兼侍讀學士四年陞南京國子監
祭酒時方修 憲廟實錄留館中校正書成乃行以
憂去服闋改太常寺少卿兼侍讀學士掌院事十三
年陞南京禮部右侍郎十五年改禮部右侍郎轉左
侍郎正德元年充 孝廟實錄副總裁尋陞南京吏
部尚書二年改禮部尚書時逆瑾用事納晉府鎮國

將軍表據等際欲進封爲郡王保坐前與尚書張其
皆持不欲進封之議忤瑾意遂令致仕坐誅有旨
在起用之列正德十二年閏十二月辛保持已歿
待後進頓立崖岸晚以忤瑾而去士論高之其所爲
詩文亦溫厚可觀

禮部尚書張駿傳

禮部尚書張駿華亭人以字學進除中書舍人供奉
文華殿歷驗封員外郎山東叅議太常少卿光祿卿
銜致仕正德二年起取其草書狂怪瑾獨喜之會進
呈通鑑纂要間有謫字令駿等再騰遂以爲勞進禮
部尚書復乞致仕正德四年正月卒得賜祭

以字學進
供奉
文華殿
歷驗封
員外郎
山東叅
議太常
少卿光
祿卿

未得
進尚

書

光祿大夫太子太保禮部尚書贈太保諡文櫛

周公經神道碑

李東陽

昔在 英宗復辟之日登明選公儲養俊哲以敷遺
於後時太原周公實領國史越三朝四十餘年游歷
諸曹官至一品再謝政事以功名終君子謂其遭際
之盛出處之善胥得之矣公諱經字伯常世居陽曲
爲巨族高祖諱某元萬戶曾祖諱溫甫祖諱傑皆贈
資政大夫都察院右都御史考諱瑄南京刑部尚書
贈太子少保諡莊懿皆以公貴贈光祿大夫太子太
保禮部尚書曾祖妣任氏祖妣張氏妣翁氏繼頌氏

晉贈一品夫人公舉天順己卯鄉貢庚辰進士入翰林爲庶吉士壬午授檢討成化丁亥修 英宗實錄成進編修己丑同考禮部會試丙申直講經筵秩滿

進侍讀丁酉考南京鄉試戊戌改春坊左中允侍

皇太子講讀辛丑莊懿公致仕居南京公乞往省

命給驛賜道里費且速其來講 御製文章大訓

皇太子每起立拱聽內閣大臣或以爲勞謂公宜跪請坐聽公不從竟得如禮甲辰丁莊懿公憂服闋久弗調或諷使圖進取計公峻却之 孝宗登極超擢

太常寺少卿兼侍讀弘治戊申 命直日講修 志

宗實錄未成已酉擢禮部右侍郎每議政莅事必傳

經義若却西域貢獅毀黃村尼寺爲先朝盛德事皆

公與左侍郎倪文毅公贊成之辛亥改吏部遷左侍

郎一日有中官諭旨欲以通政司經歷高祿爲參

議公獨承諭執不可退與尚書王端毅公上疏論之

靈壽人獻大明川民田於太監李廣戶部駁議弗得

公謂諸司宜會奏尚書耿文恪公屬公具草上之事

遂寢乙卯諸司以災異言事吏部請早視朝勤聽政

節侈費省遊幸止貢獻而斥樂戲一事尤激亦出公

手後有蹤跡爲此草者以問耿公公曰宜以實對耿

斥崇獻

田守

官

曰吾爲尚書不宜他議時論益兩賢之內辰拜戶部
尚書諸王府多奏欲自領河泊所賜稅罷其官公言
國體非便且民力不能堪乃止有中官織幣南京奏
給長蘆鹽八千引歸於兩淮仍給淮鹽價銀二萬兩
公言鹽筴本以濟邊且各有分地若公許越境則私
販必多官鹽反滯命止長蘆鹽勿給浙江守臣亦請
給竹木銀鈔稅爲織費公又言關征非舊且浙地大
小民困徵役乞暫停織造從之每委官監稅必論以
愛節民力課入多者則與下考大同缺馬尚書馬端
庸公請給折糧銀就市之且戒督糧官毋得沮格既

實積
寫職
不宜
深幸

止括
積貯
奏錄

奏止
太倉
銀為
觀燈
具

得旨公言糧馬各有職不宜侵奪且引祖訓六部

不許相壓之文為據詞甚激上為改命兵部以馬

價銀充用給事中魯昂以財用匱乏請令諸藩公帑

積貯及均徭羨銀盡輸太倉公言用不足者蓋以織

造賞賚齋醮土木之故若一切節省自宜少裕必欲

盡括天下之財恐非藏富於民之意又有旨取太

倉銀三萬兩為張燈具公言不可以小民膏脂供耳

目之玩乃命以明年內庫歲額補還之內需堂奏

增灑掃卒當給月廩公言禁地非外人所得人不過

為守者私役耳疏再上竟寢之清寧宮災方議修建

具

兵部
奏

事
成
加
稅

兵部欽調山東民夫七千餘人公曰今歲歉民貧不
可使遠去御井請以本部發銀就京師雇役為之外
戚張氏有河間 賜地數百頃欲并其旁近民田千
餘頃得之且乞畝加稅銀二分公言河間多沮洳比
因久旱貧民卽退離地耕之遇潦輒沒卽欲加稅將
貽無窮之害且王府 賜田例畝稅二分而此獨加
稅人將謂朝廷待外戚與宗親異矣又聞 憲宗妃
家亦有私田與民田比一切奪之彼亦無以為業人
又將謂朝廷待張氏與他外戚異矣疏三四上後有
以地獻為東宮莊者 上因公奏皆抵之法無論雙

感貴幸有所陳請公一裁以法皆欲不得肆有言官
及部屬以言事獲罪與同官上疏拯之聲稱籍甚而
怨謗亦日深庚申以災異乞休致 詔許之加大子
太保 賜勅給驛令有司月給米三石歲給輿隸四
人 命下廷臣皆相顧失色爭上疏留之不得自是
數年中外請留及復起者多至八十餘疏前此未之
有也公歸摘 勅詞二字爲保完堂嘯傲其間乙丑
今天子嗣位特起爲南京戶部尚書公辭以疾會丁
繼母憂未上戊辰服闋改禮部又辭 上降勅遣使
卽其家起之至京疾作寓都城外 上遣人慰問賜

玉帶及通鑑纂要以示寵異比莅事數月疾復作累
疏乞休乃許之復 賜勅象諭推封三代月廩與諱
視昔有加焉公將曹公以貞時爲太子少保兵部尚
書留公暫駐京師以便醫藥明年乃行又明年以貞
入內閣叅預機務報至公已疾革聞而領之遂溘庚
午二月二十二日也 上震悼輟朝一日贈特進光
祿大夫右柱國太保謚文端 命工部治葬事禮部
諭祭者九公年七十有一公鄉試時有甘露降於縣
學之松學者因稱爲松露先生亦以自號少穎敏而
莊重寡言笑繼母性嚴急奉事惟謹遇諸弟友愛曲

至母弟繪早卒撫其四孤皆有仕籍少受學於吳希
政釋恩吳旣謝事歲致衣一襲銀十兩終其身其友
蔡知府霖卒申御史論罷官皆貧甚並致佞即久不
厭其敦尚義氣類如此爲詩文及書麗而有則自爲
小官已志世用日侍莊懿公習聞天下事久置清獻
兩薦爲內閣不果入其爲尚書簡任屬吏親爲裁決
剗繁應變略無稽滯而秉政執法不爲權勢所撓尤
人所甚難者銘曰國有世臣實稱濟美其最貴者尚
書父子施何耿王維白及倪公益其一他莫與齊參
有兩岐芝有三秀矧人有生得物之厚雖家之昌維

圖之光氣運攸繫亦靡厭常南都四傳公際其盛令
終全歸公受其正父曰莊懿子曰文端代有美諡夫
人則難亦有難者相係科第公居其間有創有繼一
品雖榮公不爲華七十誠希公不爲遐胡遠之難而
退斯易所不朽者匪世祿謂太行之西有生若人百
世而下其永有聞

禮部尚書傅珪傳

傅珪字邦瑞保定清苑縣人成化丁未進士改翰林院庶吉士授編修弘治中兼司經局校書與修大明會典陞左春坊左中允兼編修丙辰乙丑一再同考會試正德初以東宮恩陞左諭德兼侍講充經筵講官與修孝廟實錄清理軍職貼黃丁卯考應天鄉試戊辰考武舉奉命授庶吉士業充日講官劉瑾柄政摘會典訛字珪以嘗與纂修降修撰旋以史勞陞左中允歷侍講學士庚午考順天鄉試陞吏部右侍郎轉左侍郎陞禮部尚書致仕正德十年四

月卒年五十七珪爲人強毅有執持人不能干以私
在禮部守法持正嘗因類奏四方災異陳時弊十事
言甚剴切以此忤權倖忽傳旨諭乞休珪抗疏得
歸南京言官交章留之不報家居杜門謝賓客絕跡
公府遺言誠子孫忝竊太官無以報國愧母以恤典
請御史盧雍等以爲言給祭葬如例

上方好佛自名大慶法王外廷知之無微以諫齊僧
奏討田百頃爲大慶王下院傅公遂劾僧曰法王何
爲者至與尊號並列大不道當誅有詔不問其
妄求亦止優人臧賢被寵能軒輊士夫士夫或與善

賢因是請改牙牌製如羣僚印文改方者傅公不可
召老優更事者詰曰爾優敢亂法爾寵可常保否即
遣爾辱禍靡極矣優乃戢但與新之盜劉六擾中原
勢炎炎熾太監問以侍郎完征之不能滅乃先行左
右賞閹後曹又立監鉛名謀統軍 命多官議可否
泉依違不斷傅公怒而言曰今兵老民疲直以多目
功者失士心賊在肺腑孔棘民譁然思亂禍旦夕及
宗社吾儕死不償責諸公尚唯唯將何待乎明日竟
遣監鎗者傳 旨令傅公致仕

忠鏡別傳

宗祿大夫太子太保禮部尚書掌太常寺事
太子太傅西郭田公景賢墓誌銘

楊廷和

公諱景賢字宗儒號西郭先世保定府涑水縣人曾祖行簡洪武初徙居順天之涿州遂占籍焉祖文質初以季子貴贈承德郎戶部山東司主事後以公貴累贈資政大夫禮部尚書祖母吳氏累贈夫人繼母牛氏先封太安人累贈夫人父寬累贈資政大夫禮部尚書母袁氏封太恭人累贈夫人公自幼聰穎早通大義未冠遭父艱哀毀欲絕喪葬咸如禮鄉人

知爲偉器服闋補郡庠生成化甲午領順天鄉薦明年登進士觀戶部政授戶科給事中歷陞通政司左右叅議太常少卿通政使禮部左右侍郎尚書太子少保屢奉勅查盤官府等處邊儲問實店廡黃花等關隘祭告關里及岳鎮山川古先帝王陵寢所至興革利弊廣斥埃采訪民瘼節陳時弊俱見嘉納嘗侍經筵爲廷試讀卷官供郊廟祭祀登極大禮每有文綺玉帶麟服之錫叛逆削平賜賀功牌白金綵幣考績賜寶鏹上尊少牢朝廷禮遇優厚公益懇謹茲孜孜奉公無少瑕議正德甲戌以年近七十

兩疏乞休未允復連引疾 上念其懇切特從所請
加太子太保 賜璽書給驛還鄉令有司月給米三
石歲撥輿隸四名備用陞辭之日復 命中官賚寶
錢三千錠充路費蓋異數也既乘傳公卿祖餞盛集
郊外各繪圖賦詩贈之比歸杜門晏息課誘子孫怡
如也正德己卯以疾卒春秋七十有四訃聞 上思
悼久之贈太子太傅遣官諭祭者五 命工部營葬
事公器宇恢弘天性孝友在仕途四十四年始終一
節不徇私比不營產業富逆瑾用事煽毒縉紳於公
靡所中傷人咸謂公盛德雖奸雄亦敬服也尤篤於

行義樂於施予居官所入俸資僅供日用囊無銖兩
之積

禮部尚書兼翰林院學士李遜學傳

禮部尚書兼翰林院學士李遜學字希賢河南上蔡縣人成化丁未進士改翰林院庶吉士授檢討弘治丙辰陞浙江按察司僉事以憂去終喪改陝西陞副使又以憂去終喪改山東前後更三任俱提調學校所至務從寬厚頗得士心正德戊辰陞太常寺少卿提督四夷館明年仍入翰林兼侍講陞戶部右侍郎提督倉場尋改禮部陞左侍郎乙亥陞南京禮部尚書丙子以奉賀表入京改禮部明年兼學士掌詹事府事入內閣專管 誥勅奉 命授庶吉士業正德

十四年二月卒祭葬如例遷學爲人同與頗不羈爲
詩文有藻思